



大清文宗協天翊運執中垂謨懋德振武聖孝淵恭端仁寬敏
顯皇帝實錄卷之一百五十一

咸豐四年甲寅十一月丙子諭內閣駱秉章奏總兵未能得力等語。廣東南韶鎮總兵多順以專閫大員心地既不明白。又復性耽翹轍實屬庸劣無能。多順著即行開缺。交駱秉章再行查看。是否尚堪降補。據實參奏。○又諭駱秉章奏疏防不職各員等語。湖南署郴州直隸州知州楊恩紱性情浮妄。於粵匪竄近邊界時毫無布置。並將家屬遷避。以致人心不固。永明縣知縣吳純平日不協輿論。並不能聯絡紳團。致賊匪竄掠縣境。一籌莫展。均屬庸劣不職。并用遊擊蘇元林。

帶兵赴永州時。適道州被圍。該員援勦失利。遽行退回。尤屬庸懦不堪。楊恩紱。吳純。蘇元林。均著革職。永不敘用。署嘉禾縣知縣呂錫楨。於奸匪焚毀衙署。監犯乘機脫逃之時。未能先事豫防。亦非尋常疏忽可比。著即革職。仍留營效力。○諭軍機大臣等。駱秉章奏。分路勦辦犯境粵匪獲勝一摺。另片奏。探防調援各情形。此次廣東。廣西。兩省匪徒。同時竄撲湖南邊界。分擾桂陽。道州等州縣。猖獗之勢。幾於應接不暇。均經在事文武督率兵勇。分投堵勦。轉危為安。該省官紳。協力同心。以少禦眾。各員弁兵勇。亦能人人用命。破陣衝鋒。具徵敵愾同仇。實堪嘉尚。現在本省大兵。多半隨征東下。而鄰省

兵力。亦無可分撥。各路竄匪。雖經擊退。仍須隨時激勵鼓舞。以期捍衛地方。該撫籌防東西兩路。以郴桂永州為重。分飭江忠濟。王鑫等。統兵前往堵截。彼此互為策應。所辦亦是。惟連州賊勢甚熾。韶郡現復被圍。其灌陽。賀縣之匪。仍窺伺永明。江華一帶。兩路並重。若專事籌防。自不如相機協勦。較易為力。前此調赴韶州援勦之辰沅官兵一千名。當已行抵該郡。能先將此股勦洗。不但驛路疏通。並可移此有用之兵。以次援應他處。著駱秉章。妥籌全局。既須固守本境藩籬。勿令賊蹤復行闖入。仍應無分畛域。隨時飛飭帶兵文武。及各地方官。防勦兼施。實力堵遏。其粵東省城。近日能否解圍。並此

外各屬賊情。均著探明馳報。以慰廛懷。將此由六百里加緊諭令知之。○以雲貴督標中軍副將豐伸。為廣東南韶連鎮總兵官。○以湖南防勦出力。賞同知王鑫。守備周雲耀。花翎。知州馮崑。藍翎。餘升賞有差。○以勦辦湖南攸縣游匪出力。予千總王佐清等。升補有差。○以勦殲湖北崇通賊匪出力。賞五品銜訓導江忠淑。花翎。知縣趙啟玉等。藍翎。餘升敘有差。○予湖南陣亡把總許紹棠。黎景星。周興朝。賈聯元。外委蔣景亨。祭葬世職。軍功朱其武。祭葬世職。如把總例。監生陳瑞海。賞卹如例。○丁丑。命於大高殿祈雪。

上親詣行禮。○遣惇郡王奕誥。詣

宣仁廟。

凝和廟。恭親王奕訢。詣

昭顯廟。

時應宮拈香。○諭內閣。恆春奏。勒休知縣。私自出省。請革職。提訊一摺。勒休山西興縣知縣。梁元槐。虧短錢糧。至一萬餘兩之多。並未交代清楚。輒敢私往湖北樊城地方。實屬膽玩已極。梁元槐。著先行革職。該員原籍廣東。著湖北。廣東。各督撫。確查梁元槐。逗遛何處。即日派員押解山西。交恆春提省訊辦。如查有侵那情弊。即著據實嚴參。○戊寅。

聖祖仁皇帝忌辰。遣官祭

景陵。○

上詣

壽皇殿行禮。○以故扎薩克貝子伊達木扎布子。二等台吉車林多爾濟襲爵。○己卯。諭軍機大臣等。蔣霽遠奏。請飭鄰省協濟軍餉一摺。貴州桐梓縣逆匪滋事。蔓延仁懷。並攻撲遵義郡城。現經蔣霽遠等親往督勦。征兵雲集。需餉孔殷。著樂斌。恆春。王慶雲。於各該省。無論何款項下。各籌撥銀十數萬兩。派委妥員。剋日起解前往。毋稍延誤。並一面知會蔣霽遠等。派員迎提。一面將起解日期馳奏。將此由六百里各諭令

知之。○以江蘇勦辦洋匪出力。賞通判鍾照。守備楊鎮華。花翎。同知潘瑩。淮等。藍翎。餘升敘有差。○以江蘇清河縣練勇出力。賞知縣吳棠。花翎。餘升補有差。○庚辰。諭內閣。楊需奏。官軍克復廣濟。黃梅。全楚肅清一摺。楚北潰匪。自田家鎮受創以後。句結安慶賊眾。併入廣濟。黃梅兩縣。仍圖乘虛竄擾。當經塔齊布。自南岸率領陸軍渡江會勦。魁玉。楊昌泗。亦跟蹤追擊。行抵廣濟。塔齊布。與羅澤南等。由菩提壩南路進攻。賊勢潰散。收復廣濟縣城。餘賊仍竄往黃梅。官兵拔營追襲。該逆分三大股迎拒。塔齊布。督同周鳳山。羅澤南等。分中左右三路迎擊。賊眾披靡。魁玉。楊昌泗。後隊繼至。與塔齊布大

軍直抵賊營。縱火焚燒。即將黃梅縣城克復。楚北境地一律肅清。其九江賊匪亦經李孟羣、彭玉麟等會同夾攻。漸次勦洗。該督現由黃州移兵援應後路。指日塔齊布與曾國藩水師會合。即可直達安慶。齊擣金陵賊巢。諒無難一鼓殲除。廓清餘孽也。○諭軍機大臣等。楊需奏克復廣濟、黃梅一摺。所敘進攻九江情形。似該郡賊黨尚復不少。塔齊布渡江而北。南岸官軍即不能得手。是江西陸路兵勇殊不足恃。塔齊布仍須渡回南岸。攻克九江。方能水陸會齊。順流東下。若塔齊布一軍由宿松、太湖徑抵安慶。而南岸兵力較弱。則九江不能即克。水軍為所阻截。未免聲勢隔絕。此時曾國藩當已與

楊需會晤。籌商詳細情形。諒經奏報在途。著即南北兼籌。勿致顧此失彼。楊需摺內有逆蹤竄擾瑞昌之語。未據詳晰聲敘。如果係大股分竄。則該逆仍欲上窺湖北。興國、大冶一帶尚未可恃以無虞。楊需既駐黃梅、廣濟之間。與瑞昌僅隔一江。自應酌量分兵渡江會勦。先通水師之路。然後能上保楚境。下擣皖城。該督前奏除桂明、李光榮兵勇撤回外。北岸兵勇尚不下一萬六千人。與其分駐田鎮、蘄州。遙作聲援。何如合力進攻。杜其繞竄。儻南北兩岸專恃一塔齊布。奔馳追勦。則湖北、江西兩省官兵豈不均成虛設耶。江西派出督勦之臬司譚光宸。前任總兵趙如勝。距省稍遠。亦可由曾國藩等

就近調度。俾有稟承。不可稍存畛域。貽誤事機。將此由六百里加緊各諭令知之。○辛巳。

上詣

壽康宮問

皇貴太妃安。○諭軍機大臣等。英桂奏。派兵赴皖。令牛鑑進駐潁州。並抽募兵勇。赴陳督防一摺。該撫現已添調副將希拉布等。所帶山西兵。赴牛鑑行營聽調。加以前調赴陳兵勇八百餘名。正陽一路。足資控扼。究須與袁甲三。隨時知照。聲勢方為聯絡。邱聯恩兵勇。既未能全數赴皖。即當飭令該鎮將霍邱等處擒匪。迅行勦滅。不得以駐劄光州為名。頓兵安閒。

之地。致所屬商固一帶。匪黨橫行。釀為腹心之患。六安現有添調之陝甘官兵。前往駐守。雖情形未甚喫重。然亦須相機協勦。毋但一意設防。至該撫現擬抽兵募勇出省。為牛鑑後路應援。惟歸德尚有擒匪未除。或應駐陳州。或應赴歸德。英桂當體察事機。緩急親往督辦。但攘外必先安內。賊氛不靖。固當示以兵威。至地方偶有刁民聚眾滋事。則專賴管轄之道府州縣。善於彈壓。平時撫馭有方。必不致抗官滋事之案。層見疊出。若因抗納錢糧。即須移兵動眾。徒事煩擾。且恐激而生變。該撫當嚴飭蔣啟敷等。究其起釁之由。剛柔相濟。總期分別良莠。擇尤懲治。不致釀成事端。動勞兵力。方為善策。

英桂統轄全省。所屬稍有蠢動。即係該撫之責。不得稍存大意。將此由五百里諭令知之。○壬午。以克復湖北武昌漢陽興國大冶蘄各府州縣城。賞守備余星元。滕國獻等。花翎。把總劉三富等。藍翎。餘升擢有差。○予湖北陣亡千總蘇勝。把總鄭沐。祭葬世職。六品軍功李金樑。祭葬世職。如外委例。○予湖北禦賊被戕州判魏作霖。祭葬世職。○癸未。

上詣

大光明殿。

弘仁寺。

仁壽寺拈香。○以河工穩固。頒河南省城

河神廟

御書扁額。曰榮光普護。○先是塔爾巴哈台參贊大臣英秀奏稱。塔爾巴哈台原設綠營換防官兵一千二十九員名。屯工七處。耕種兵七百名。差操兵三百名。遵擬變通兵制。酌裁浮費。請於該處屯兵內。酌撤兵二百一十名。差操兵內。酌撤兵九十名。滿漢官兵內。酌撤兵二百名。共酌撤滿漢各營官兵五百名。每年可節省本處鹽菜銀七千餘兩。又本處官廠牧放羊隻。不下數萬。除酌留孳生外。餘俱賞賣與蒙古官兵。以時價合銀。計可得價銀二萬四千兩。即在蒙古官兵每年俸餉銀內。扣留一萬二千兩。作為兩年歸還。並可裁撤牧羊兵

二百名。連前滿漢官兵共裁撤七百名。通計每年可節省銀九千六百兩。下軍機大臣會同戶部議。至是奏滿營換防甲兵。在途在防。均有鹽糧借支等項。既據該大臣等酌量裁撤。其一切鹽糧借支等項。均可覈減。於經費實有節省。至羊隻變價。以抵經費一節。覈其所奏。不但體恤蒙古官兵。兼可搏節經費。其節省銀兩。應令該大臣於估調經費時。聲明扣除。以昭覈實。從之。○以江西勦匪出力。並克復泰和安福二縣。城。賞都司馬福壽。知縣楊昇。楊曉。昀。花翎。都司伊凌阿等。藍翎。餘升敘有差。○以江西監造礮位。火藥。出力。賞同知張賦林。藍翎。道員鄧仁莖等優敘。○予江西陣亡訓導劉芳槐。典

史王廷瑞。八品軍功。易澤選。祭葬世職。○予東河搶險淹斃外委辛得書。祭葬卹廕。○甲申。諭內閣。吏部奏。捐免試俸。歷俸人員。與京察保薦例義未符。請旨定奪一摺。此項捐免試俸。歷俸人員。既得題升。截取已屬從優。所有京察大典。自不得與資深人員同登上考。著各該部院堂官。仍照舊章。分別試俸。歷俸年限。辦理。以符定制。○又諭。載齡。崇實。奏。遵查川省大吏。收受陋規一摺。各省規禮陋習。例禁綦嚴。原以懲貪墨。而杜夤緣。若上司不能廉潔奉公。又安望其正已率屬。吏治之壞。實由於此。四川一省。自總督以及監司大員。率皆通同一氣。收受苞苴。大吏以捐款為名。復陋規之實。司道以賂

削所得。為結納之資。試思府州縣以取之於民者。應司道之求。司道又以索之於府州縣者。飽督撫之欲。似此營私肥己。不顧廉隅。無怪屬員之藉逞刁風。公務之日就廢弛。甚至鑽謀賄囑。朋比為奸。尚復成何事體。即將裕瑞以下。與受各員。從重按律懲辦。亦屬咎所應得。姑念其官非一任。事非一年。本日已將裕瑞併案革職。其餘司道各員。除另案查辦外。已往之事。姑予從寬。嗣後該省一切陋規。著永行禁革。如有陽奉陰違。仍蹈積習。或另改名目。暗復舊規者。著該部從嚴定擬處分具奏。以儆官邪。並通諭各直省督撫。督率監司大員。務當簞簋自飭。潔己愛民。毋得婪私贖貨。自取愆尤。儻屢訓

不悛。仍復罔知自愛。一經發覺。必即重懲。勿謂寬典可倖邀也。懍之。○又諭載齡崇實奏。查明督臣訪辦謀逆重案。草率定讞。各情一摺。前據四川學政何紹基。參奏總督裕瑞收受陋規。並於鄭懷江等。謀逆一案。辦理錯誤。特派載齡崇實。前往四川查辦。茲據奏稱。鄭懷江等。平日結會樹黨。橫行鄉里。復因糾眾爭奪。解邦滌石獅。欲行械鬪。以致居民驚徙。實屬目無法紀。立置重辟。已足蔽辜。裕瑞輕信把總曾芝荃等。偵探之詞。雖經各屬查明聲覆。仍固執己見。輒以謀叛定案。該督身膺疆寄。於民命重情。應何如詳審慎重。乃有意傳會張大。枉坐人罪。非尋常錯誤可比。且據載齡等。查明該督平日

寶鑑卷一百五十一
有收受屬員陋規確據。尤屬辜恩溺職。撤任四川總督裕瑞。著即行革職。所有會審承審各員。四川候補同知沈英。候補通判趙友泰。署瀘州知州桂延。署富順縣知縣徐繼鏞。候補直隸州知州音德布。琦齡。並審轉未經結案之前。署按察使清安泰。及勘詳之前任按察使升任廣西布政使胡興仁。均著交部分別議處。其緝拏此案之知縣曠一清。守備李春錦。千總蘇光贊。前經裕瑞請予議敘。著即撤銷。署南江縣知縣伊克精阿。經裕瑞奏參革職。茲既查明鄭懷江。並無謀叛重情。惟該員於地方棍徒。未能嚴辦。究屬疏於覺察。伊克精阿。著開復革職處分。仍交部議處。○又諭載齡。崇實。奏參道員

聲名狼籍等語。四川建昌道俞文詔。經該侍郎等。訪查該員。前在首府任內。把持公事。自府廳以下各官。均奔走其門。聲名狼籍。劣蹟昭彰。若非立予罷斥。不足以儆官邪。俞文詔。著即行革職。○又諭載齡。崇實。奏。請將逞刁藐法之把總懲辦等語。四川把總曾芝荃。謝洪恩。於載齡等。查辦鄭懷江案情。飭傳到案。畫供後。輒復另遞親供。蓋用鈐記。經載齡等。摘頂示懲。曾芝荃。袖出小刀。自行劃傷。卧地嚷鬧。謝洪恩。亦直撲公案。大肆咆哮。似此兇橫藐法。殊出情理之外。曾芝荃。謝洪恩。業經載齡等。咨革。著即發往新疆充當苦差。先於本地方。枷號兩箇月。以示懲儆。○又諭王懿德等。奏參勒休知府挾

制上司。請從嚴懲辦一摺。勒休漳州府知府金崇。於被參後。輒敢向該藩司肆意咆哮。情同挾制。若不從嚴懲辦。何以儆刁玩而肅官箴。金崇著即革職。勒令回京。交該旗嚴加管束。以示懲儆。○諭軍機大臣等。載齡。崇實奏。遵查四川各案。審明定擬各摺片。該侍郎等。前奏學政何紹基。不收水禮一節。殊難憑信。當經諭令再行確訪。並查該員聲名如何。未據該侍郎等覆奏。何紹基原參川省各員。稱藩司楊培善。誣嗣有人。奏。俞文詔與該司聯為一氣。為州縣代謀升調。拜認師生。是楊培之不能勝任藩司。已可概見。有無別項貪污劣蹟。並俞文詔索取行戶陋規。得受廠商賄賂各款。均著再行查確。

據實參奏。毋得稍有不實不盡。將此由五百里諭令知之。○又諭。勝保奏。連日攻賊情形。並統籌全局等語。覽奏殊多支飾。該大臣擁兵高唐城下。數月以來。未建寸功。據奏攻其西門南門。冀可出其不意。是必偵知該兩門賊勢鬆懈。可以一鼓而進。方為確有把握。乃不過誘殺廿餘人。仍屬不能得手。所開地道。與安設地雷。亦未見迅速辦妥。復以賊濠頗深。又待籌加鑲板。賊情詭詐。其堅拒之計。既百出不窮。而該大臣籌攻之具。亦已多方。均屢試而不效。可見兵法所謂知己知彼者。該大臣直未講求。節次諭令速圖進取。毋再遷延。豈蕞爾孤城。臨以鉅萬重兵。竟無制勝之策。該大臣自知慚憤。不

思設法剋期攻克。以贖愆尤。轉慮及於東南兵力之不能兼顧。以楚軍南下。賊勢必致旁竄。防兵偪歲生懈為虞。所言何嘗不中肯綮。獨不知該大臣麾下將士。裹糧坐甲。瞬偪殘年。不能生解耶。現在楚境蕩平。曾國藩等。埽除九江一帶賊匪。後即可直擣安慶。南北各要隘。早經諭知各路統兵大員。及各該地方大吏。嚴兵扼守。勝保所稱南賊於年內果無蠢動。則北路可望肅清。是直以南賊能否北竄。為高唐能否攻復之符驗。舍己責人。尤為鄙佞。不知東境之賊。不過連鎮竄餘之匪。為數無多。一經勦洗。則南賊聞風膽落。更不敢復萌北窺之心。即連鎮賊巢。亦失其犄角之勢。勝保束手無策。遁辭

飾非。清夜自思。能無羞愧。且聞該逆並未關閉城門。任意出入。兵勇無人過問。每於數十里外。搶掠村莊。劫取糧食。儻任其陸續宵遁。茫無聞知。將來以收復空城入告。糜餉勞師。俾逆賊蔓延他處。勝保尚有何顏見朕耶。著即懍遵前旨。速籌攻復。毋得於數日後具奏軍情一次。以空言為塞責也。將此由六百里加緊諭知勝保。並諭德勒克色楞。善祿。崇恩知之。○以勦辦江西長甯賊匪出力。賞把總張朝相等。藍翎。餘升補有差。○乙酉。命於

大高殿設壇祈雪。

上親詣行禮。○遣惇郡王奕諒詣

宣仁廟。

凝和廟。恭親王奕訢詣。

昭顯廟。

時應宮拈香。○詣

壽康宮。問

皇貴太妃安。○諭內閣。奕綱等奏。長蘆應解息銀。請飭銀票各半解交一摺。所有長蘆鹽政。每年應解廣恩庫息銀。嗣後著銀票各半解往。以資辦公。○展

西陵八旗兵丁應扣借支銀。○緩徵兩淮富安。安豐。梁埭。東臺。何埭。丁溪。草堰。劉莊。伍祐。新興。廟灣。板浦。中正。臨興。十四場。

被水竈地新舊額賦有差。○緩徵甘肅皋蘭。河。渭源。靜甯。隆德。甯夏。靈。平羅。八州縣。被水。被旱。被雹。被霜。節年舊欠銀糧。及靖遠。隴西。會甯。西和。安化。甯。涇。崇信。靈臺。九州縣。新舊銀糧草束。

大清文宗協天翊運執中垂謨懋德振武聖孝淵恭端仁寬敏
顯皇帝實錄卷之一百五十一

